

<><><><><><>

## Headlines

1. भारत ते पाकिस्तान दिएं फौजें फरवरी 2021 आहले संघर्ष विराम समझौते गी बरकरार रखने पर सैहमति जाहर कीती ऐ। दौनें पक्खें भविक्ख च गलतफैहमिं गी होने थमां रोकने लेई हीलें दा पता लाने दा बी फैसला लैता ऐ।
2. मुख्यमंत्री ओमर अब्दुल्ला होरें आखेआ ऐ जे उंदी सरकार जम्मू-कश्मीर दे चबक्खे विकास ते सार्वजनिक सुविधाएं च बेहतरी लेई वचनें बज्जी दी ऐ।
3. केन्द्री मंत्री डाक्टर जीतेन्द्र सिंह होरें जम्मू च सीएसआईआर – ट्रिपल आईएम नेशनल स्टार्टअप उत्सव दा उद्घाटन कीता ते आलमी सतह उप्पर स्टार्टअप तंत्र च भारत आसेआ त्रीये थाहरै पर पुज्जने दी उपलब्धि पर बी लोऽ पाई।
4. फौज दी व्हाईट नाईट कोर दे जीओसी होरें जम्मू च बक्ख-बक्ख सुरक्षा एजेंसिं दी इक सांझी समीक्षा बैठक दी प्रधानता कीती।
5. प्रधानमंत्री नरेन्द्र मोदी होर कल दिनै 11 बजे आकाशवाणी पर अपने रेडियो कार्यक्रम मन की बात राहें देश-विदेश दे श्रोताएं कनै अपने बचार सांझे करडन।

<><><><><><>

## **India Pak Armies**

भारत ते पाकिस्तान दिएं फौजें दे प्रतिनिधिं जंदे रोज जम्मू-कश्मीर च फरवरी 2021 आहले संघर्ष विराम समझौते गी बरकरार रखने सने भविक्ख च गलतफैहमिं गी रोकने लेई बी अपनी सैहमति जाहर कीती ऐ। दौनें मुख्यें दे ब्रिगेड कमांडरें, हाल दे दिनें दरान कब्जा रेखा ते अंतर्राष्ट्री बन्ने कश होई दिएं घटनाएं ते आईईडी धमाकें परैन्त बनी दी तनोतनी गी घट्ट करने दे मकसद कनै पुंछ जिले च फ्लैग मीटिंग कीती। सवा घंटे तोहड़ी चली दी इस बैठक दा आयोजन चक्कां दा बाग आहले क्रॉसिंग प्वाईट पर कीता गेआ ते एहदा मकसद इलाके च रमानदारी ते स्थिरता बरकरार रखना, जकीनी बनाना हा। इस दरान दौनें पक्खें, संघर्ष विराम समझौते दे महत्व पर जोर पाया ते तनोतनी घट्ट करने लेई संचार सरिस्ते च सुधार ते तेजी आहनने पर अपनी सैहमति जाहर कीती।

<><><><><><>

## **CM Bridge Inauguration (byte)**

ढांचागत विकास दी दिशा च इक महत्वपूर्ण गैह पुट्टदे होई मुख्यमंत्री ओमर अब्दुल्ला होरें अज्ज गांदरबल दे कंगन इलाके च सिंध दरेया उप्पर पुलै दा उद्घाटन कीता जिसी मते चिरे सवां बलगेया जा करदा हा। इस मौके उप्पर मुख्यमंत्री होरें जम्मू-कश्मीर दे चबक्खे विकास ते सार्वजनिक सुविधाएं च सुधार लेई अपनी सरकार दी वचनबद्धता गी फही पक्का कीता। उ'नें इस गल्लै पर जोर पाया जे एह नमां पुल, संपर्क सरिस्ते च सुधार आहन्नोग ते मुकामी लोकें लेई आओजाई मती सखल्ली बनाग। इस परियोजना गी इलाके लेई इक बड़े महत्वपूर्ण जरिये दे तौरा पर दिक्खेआ जा'रदा ऐ कीजे एहदे कनै जित्थे इलाकाई विकास गी बढावा मिलोग उत्थे गै जात्तरा सखल्ली बनोग ते खित्ते दे बक्ख-बक्ख हिस्सें बश्कार संपर्क च बी बाददा होग। इस बारै सरकार दा आभार व्यक्त करदे होई इक मुकामी बसनीक नै गलाया

<><><><><><>

## Jitendra Singh (byte)

भारत दे स्टार्टअप तंत्र गी इक बड़डा बढावा दि'दे होई केन्द्री मंत्री डाक्टर जीतेन्द्र सिंह होरें अज्ज जम्मू दे गांधी नगर च सरकारी महिला कॉलेज च द'ऊं रोजा सीएसआईआर – ट्रिपल आईएम राष्ट्री स्टार्टअप महोत्सव दा उद्घाटन कीता। कार्यक्रम च अपने संबोधन दे दरान डॉक्टर सिंह होरें भारत च स्टार्टअप्स दे काबिले जिक्र विकास उपपर लोऽ पांदे होई आखेआ जे छडे इक्क दहाके च स्टार्टअप्स दी गिनतरी तकरीबन 3 सौ 50 कोला बधियै 1 लख 75 जहार होई गई ऐ। उ'नें जोर देइयै आखेआ जे इस विकास नै भारत गी स्टार्टअप तंत्र च आलमी सतह उपपर त्रीये नम्बरै पर पुजाई दित्ता ऐ, जेहड़ा देसै आस्तै इक महत्वपूर्ण उपलब्धि ऐ। पत्रकारें गी संबोधित करदे होई डॉ. जीतेन्द्र सिंह होरें आखेआ

<><><><><><>

## Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उपपर 07 मार्च 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट [www.newsonair.gov.in](http://www.newsonair.gov.in) पर उपलब्ध ऐ।

<><><><><><>

## Security Review

फौज दी व्हाईट नाईट कोर दे जनरल ऑफिसर कमांडिंग, लेफ्टिनेंट जनरल नवीन सचदेवा हुंदी प्रधानता तैहत इक सांझी सुरक्षा समीक्षा बैठक लाई गई जिस दरान खित्ते च रमानदारी बरकरार रखने सरबंधी जतनें उपपर चर्चा कीती गई। बक्ख-बक्ख सुरक्षा एजेंसिएं, जम्मू-कश्मीर पुलस ते सीआरपीएफ दे प्रतिनिधिएं बी इस बैठका च हिस्सा लैता। एहदा मुंडला मकसद सुरक्षा सरबंधी चुनौतिएं दा सामना करने च सुरक्षाबलें बश्कार आपसी तालमेल जकीनी बनाना हा। इस सांझी पैहलकदमी दा उद्देश्य खित्ते च हाल दिएं आतंकवादी गतिविधिएं दी पच्छोकड़ै च सुरक्षा सरबंधी हीलें गी तगडा करना ते शांति-रमानदारी जकीनी बनाना ऐ।

<><><><><><>

## PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” च कल 23 फरवरी गी देश विदेश च रौहने आले श्रोताएं कन्नै बचार सांझे करगन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 119मीं किश्त होग। एह कार्यक्रम आकाशवाणी ते दूरदर्शन दे समूलचे नेटवर्क दे अलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए. आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग।

<><><><><><>

## Samba Criminal Laws (byte)

सांबा दे डिप्टी कमिशनर राजेश शर्मा हुं'दी अगुवाई च जिला प्रशासन सांबा नै डीसी दफ्तर परिसर च नमें लागू कीते गेदे अपराधिक कानूनें उपपर इक जागरूकता सेमिनार दा सरिस्ता कीता गेआ। सेमिनार च भारती न्याऽ

संहिता, भारती नागरिक सुरक्षा संहिता ते भारती साक्ष्य अधिनियम दे प्रमुख प्रावधानें गी केंद्रित कीता गेआ। एह नमें कानून देसै दी अपराधिक न्याऽ प्रणाली च इक महत्वपूर्ण तब्दीली आहन्नडन। सांबा दे डिप्टी कमिशनर होरें कानूनी रूप कन्नै सशक्त समाज गी बढावा देने च इ'नें प्रगतिशील कानूनें गी असरदार तरीके कन्नै लागू करने आस्तै जन-जागरूकता दे महत्वै उपपर जोर दित्ता। इस मौके उपपर बोलदे होई सांबा दे डिप्टी कमिशनर राजेश शर्मा होरें आखेआ

<><><><><><><><>

### Ramban Farmers Visit (byte)

आधुनिक करसानी दे तौर-तरीकें गी बढावा देने दे मकसद कन्नै जिला रामबन दे 30एं करसानें दे इक दल गी जम्मू ते कश्मीर दे अंदर अंतर-केन्द्र शासित प्रदेश दे राई-बाई दौरे आस्तै झंडी दस्सियै रवाना कीता गेआ। बीएं दी नमीं किस्में दे विकास आहली पैहलकदमी तैहत आयोजित इस दौरे दरान इ'नें करसानें गी शोरे कश्मीर युनिवर्सिटी ऑफ एग्रीकल्चरल साईंसेज एंड टेक्नोलाजी, कश्मीर च लेता जाहग। नेहियें जात्तराएं दे महत्वै उपपर जोर दि'दे होई एग्रीकल्चर एक्सटेंशन अधिकारी आफताब अहमद होरें करसानें गी आधुनिक तौर-तरीकें गी अपनाने ते राई-बाई उद्यमिता गी बढावा देने आस्तै प्रोत्साहित कीता। करसानें उत्पादकता ते मुनाफे च सुधार करने आस्तै नमीं तकनीकें गी सिक्खने दे बारै च उत्साह जाहिर कीता ऐ। नेह गै इक करसान नै अपने विचार सांझे करदे होई आखेआ

<><><><><><><><>

### DC Udhampur Festivals (byte)

महाशिवरात्रि ते रमजान दे समारोहें गी बवस्थित ढंगै'नै मनाने गी जकीनी बनाने लेई उधमपुर दियें डिप्टी कमिशनर सलोनी राय, एसएसपी उधमपुर आमोद अशोक नागपुरे ते होरनें जिला अधिकारियें सिविल समाज दे प्रतिनिधिएं कन्नै तैयारियें दी समीक्षा करने आस्तै उधमपुर शैहरा दा दौरा कीता। एह दौरा ध्यारें दरान बजारें च भीड़ दे बधदे प्रवाह दा प्रबंधन करने आस्तै बवस्थाएं दा आकलन करने पर केंद्रित हा। अधिकारियें सुविधाएं दी कमी आहले खेत्तरें दी बी पन्छान कीती ते इ'नें महत्वपूर्ण मौकें पर जनता आस्तै परेशानी मुक्त अनुभव जकीनी बनाने आस्तै सुधारें दी लोड़ पर लोऽ पाई। इस मौके उपपर आकाशवाणी समाचार कन्नै गल्ल करदे होई उधमपुर दिएं डिप्टी कमिशनर सलोनी राय होरें आखेआ

<><><><><><><><>